

禮記集說

五

禮記卷十六

莊有可集

大傳

傳訓也言所訓者皆其大者也

禮不王不禘王者禘其祖之所自出以其祖配之

已詳喪服小記

諸侯及其大祖大夫士有大事省於其君于祫及其高祖

大祖始祖也即始封之君若魯以周公為大祖雖非始封亦別

子為祖也省猶善也言有功伐見省記於君也于逆上也祫本

諸侯之禮大夫所不當用而用之是于也高祖蓋亦謂始祖也

于祫及高祖僭也此衰世之事記誤引也禮諸侯之大夫必三

命上卿受命於天子而後可以賜族立宗上祀有三廟其不命於天子者大夫二廟士一廟耳既非命於天子而止省於其君尚不得立三廟何得妄祫高曾上僭諸侯之禮又兼士言更混牧之野武王之大事也既事而退柴於上帝祈於社設奠於牧室遂率天下諸侯執豆籩逡奔走追王大王亶父王季歷文王昌不以卑臨尊也

大事謂伐暴救民戎事之大也祈當作祠柴祠設奠皆告成功非有所也牧室牧野之室古者郊闕皆有館設奠牧室告成功於遷廟之行主也逡疾也與駿同亶父大王字其名無考記者據縣詩稱之然王季文王又名非體也武王伐紂既事而告成功

於天地行主禮也遂率天下諸侯而追王不言何所恐非事實
其事當俟武王即位歸鎬後中庸言周公成文武之德追王大
王王季則武王時所追王者當止有文王記又約舉之耳不以
卑臨尊非也祖考則已尊矣豈又以爵位為尊耶周之追王亦
以王業所基於禮意當以天下尊歸之耳大王以上至於后稷
非王業所自始原未追王也何嘗不以后稷為始祖乎

上治祖禰尊尊也下治子孫親親也旁治昆弟合族以食序以昭
繆別之以禮義人道竭矣

治猶正也竭盡也猶備也合族以食如族食世降一等也序以
昭繆上治下治旁治皆以昭穆之序也別遠近親疎之別上曰

祖曰祢下曰子曰孫旁曰昆曰弟此別之以禮尊尊有等親親有殺合族有降此別之以義如是而人道乃盡言務本則無餘蘊也

聖人南面而聽天下所且先者五民不與焉一曰治親二曰報功三曰舉賢四曰使能五曰存愛五者一得於天下民無不足無不
膽者五者一物紕繆民莫得其死聖人南面而治天下必自人道始矣

且先未遑他事也愛遺愛也凡興滅繼絕之類皆所以存遺愛也一得皆得也物猶事也紕繆猶錯誤也必自人道始言五者亦皆治人之道而始於治親也

立權度量考文章改正朔易服色殊徽號異器械別衣服此其所
得與民變革者也

文章禮法也服色服物之色如車馬之屬徽號所以自表志之
名號也器械五禮所當用之物衣服則止以衣言變革損益因
革之制此以可變者形下人道之不可變也

其不可得變革者則有矣親親也尊尊也長長也男女有別此其
不可得與民變革者也

親親仁也尊尊長長義也男女有別禮也四者人道之大經也
故不可變革

同姓從宗合族屬異姓主名治際會名著而男女有別

宗宗子也族父祖曾高而上之支派也屬聯屬也屬其昭穆之親疎遠近也異姓來嫁者也主名主母與婦之名也際會交際而相會聚也古者娶女以娣姪從雖大夫士亦然故女之名必從男而定名著而後男女之尊卑定尊卑定而後上治下治旁治因之有別也

其夫屬乎父道者妻皆母道也其夫屬乎子道者妻皆婦道也尊卑皆非己倫所以厚別也

謂弟之妻婦者是嫂亦可謂之母乎名者人治之大者也可無慎乎

以上二節皆喪服傳文然弟妻稱婦今俗語猶然蓋本夫婦之

婦與子婦之婦不同亦未可盡泥惟旁治則昆弟之妻與夫之昆弟不相為服以男女雖為倫輩而不成乎親不可相為服恐其相瀆也

四世而總服之窮也五世袒免殺同姓也六世親屬竭矣

四世共高祖五世高祖昆弟六世以外親盡無屬名也

其庶姓別於上而戚單於下昏姻可以通乎繫之以姓而弗別綴之以食而弗殊雖百世而昏姻不通者周道然也

庶衆也庶姓別於上如天子同姓別而為諸侯諸侯同姓別而為大夫大夫同姓別而為士也晉叔向曰胙之宗十一族惟羊舌氏在而已是大夫同宗又有別氏之族也戚衰也生相親則

死相哀也單薄而盡也昏姻可以通乎以下記者設為問答也
係之以姓而弗別其宗氏雖日繁其姓同也綴連屬也綴之以
食而弗殊如大廟祭畢而諸父兄弟備言燕私不至殊遠也百
世而昏姻不通自古而然但言周道偶舉近時耳然亦有語病
至後人實之以舜娶堯女為同姓則齊東野人誣妄極矣

服術有六一日親親二曰尊尊三曰名四曰出入五曰長幼六曰
從服

術猶道也親親正服也尊尊義服也名以名服也出降服也入
加服從重也長成人服也幼殤服也從服者服非由己生從人
而服者也俱見喪服傳

從服有六有屬從有徒從有從有服而無服有從無服而有服有從重而輕有從輕而重

親屬曰屬徒空也屬從如子為母黨妻為夫黨夫為妻黨也徒從如臣為君黨妻為夫之君黨妾為女君之黨庶子為君母之黨子為母之君母也從有服而無服以下並見服問

自仁率親等而上之至於祖名曰輕自義率祖順而下之至於禰名曰重一輕一重其義然也

率循也用恩則父重而祖輕用義則父重而祖愈不得不重仁重則義尤重也

君有合族之道族人不得以其戚戚君位也

君恩可以下施而族人皆臣也不得以父兄子弟之本親致戚於君以君位至尊而已之臣位卑故皆斬衰也

庶子不祭明其宗也庶子不得爲長子三年不繼祖也

三年即斬衰也詳喪服小記

別子爲祖繼別爲宗繼禰者爲小宗

亦詳喪服小記

有百世不遷之宗有五世則遷之宗百世不遷者別子之後也宗其繼別子之所自出者百世不遷者也宗其繼高祖者五世則遷者也尊祖故敬宗敬宗尊祖之義也

此條所論宗法諸侯五廟庶幾近之然天子諸侯之宗亦止族

食世降一等以繼高祖為親盡耳其實君道无終弟及時時有
之天子七世諸侯五世則遷非以高祖為限也至大夫以下謂
皆可宗及高祖且干祫之則斷斷無此理之所自出四字衍文
餘亦詳喪服小記

有小宗而無大宗者有大宗而無小宗者有無宗亦莫之宗者公
于是也

此似分別小宗大宗之義而又推廣之然甚支離蓋公子之宗
皆當以君為主君不可宗故以兄弟之或嫡或長為之宗如文
王之子為諸侯者皆以魯為宗國是也然則或長或嫡亦必為
大夫而後宗之若春秋之末公子多無位則亦何大宗小宗之

有蓋宗次於君苟無食邑未賜族雖公子不成宗以未受爵命終不得立廟也

公子有宗道公子之公爲其士大夫之庶者宗其士大夫之適者公子之宗道也

公子之公即公子之兄弟爲君者公子不得宗君故君命之宗其嫡兄弟所宗既嫡則如大宗死爲之齊衰九月其母即君母小君也爲其妻齊衰三月若無嫡而皆庶則死同爲大功九月其母妻無服蓋兄弟本齊衰期爲君厭故降在大功九月其仍齊衰者以宗也故爲其妻齊衰三月如爲宗子妻之服君之母弟多爲大夫故使羣公子宗之若皆庶而無嫡則亦僅宗其庶

之為大夫者耳苟俱不為大夫又何宗之有

絕族無移服親者屬也

移推而移之也喪服傳作施蓋古道絕族者五服之外恩推不去其姓雖同而情不更屬也無移服者雖欲為之服無可移也親者屬也者言惟親者之道為相連屬也蓋以卑屬尊以幼屬長以庶屬嫡以旁屬正皆以有親親之道

自仁率親等而上之至於祖自義率祖順而下之至於禰是故人道親親也

人道不外仁義親親仁也尊祖義也推親親之仁而上之有尊祖之義推尊祖之義而下之有親親之仁而實皆終始於親親

故人道惟親親也

親親故尊祖尊祖故敬宗敬宗故收族收族故宗廟嚴宗廟嚴故重社稷重社稷故愛百姓愛百姓故刑罰中刑罰中故庶民安庶民安故財用足財用足故百志成百志成故禮俗刑禮俗刑然後樂詩云不顯不承無斁于人斯此之謂也

此又因親親而極言之傳之所以為大也嚴猶尊也如云於穆清廟也重社稷必有田祿然後可以供祭事也百姓官伯族姓也謂凡助祭之臣禮俗刑謂以禮化俗而無不成也刑例也成也不古丕字丕顯丕承謂文王武王之謨烈也數厭也言文王武王之謨烈不外乎親親也

禮記卷十七

莊有可集說

少儀

少幼也儀曲禮也所言皆成人事然其儀度詞令必講習於童時故以少儀名篇

聞始見君子者辭

曰聞者記者謙退不敢自專以為傳聞舊說如此也君子有德位之通稱辭求見之詞

曰某固願聞名於將命者不得階主適者曰某固願見

固謂求見之切也願聞名於將命者不敢必斥見君子但願以己之名使得聞於將命而已階梯也所以引人上進者階主謂

主引進見之人不得階主猶士相見禮言無由達也意謂久欲
進見但前此無由故遲至今耳適敵古通體敵則直以願見通
詞不更言將命者省文下節同

罕見曰聞名亟見曰朝夕瞽曰聞名

罕見相見久希也疑其情之不通雖於敵者亦曰聞名而已朝
見曰朝夕見曰夕如臣之見君也瞽無目故槩以聞命通詞

適有喪者曰比童子曰聽事適公卿之喪則曰聽役於司徒

喪事憂戚無賓主之禮凡至者皆當為之執事比附也願附於
執事者也童子不得与成人比但當聽主人以事見使也司徒
掌徒役之事凡公卿之喪皆司徒率其屬以掌之故曰聽役也